

Inatsisartut inatsisaat nr. 28 ulloq 9. december 2015 suliffissanut, ilitsersuisarnernut pikkorissaqqinnernullu qitiusumik ingerlatsiviit pillugit.

Qitiusumik ingerlatsiviit suliassaat

§ 1. Kommunit tamarmik illoqarfinni tamani kommunimiittuni suliffissanut, ilitsersuisarnernut pikkorissaqqinnernullu qitiusumik ingerlatsivinnik pilersitsissapput.

§ 2. Suliffissanut, ilitsersuisarnernut pikkorissaqqinnernullu qitiusumik ingerlatsiviit suliassaraat:

1) Nuna tamakkerlugu akeqanngitsumik sullississallutik suliffeqarnerup ineriartortinneqarnissaanut, tamatumani aamma nukittorsassallugu sulisut piginnaasatigut ineriartornissaat aamma nunap iluani sumiiffinnut assigiinngitsunut nikilertortarnikkut nuttarsinnaanissaat.

2) Sumiiffinni pineqartuni inuussutissarsiortunik suliffeqarnermi suliniutit pillugit suleqateqassallutik, aamma nunap immikkoortuini nunalu ataatsimut isigalugu. Aamma suliassaraat suliffissarsiortut sulisitsisullu akornanni attavilersuisuunissaq, atorfinititsisoqar-tarnissaanik siunertaqartumik.

3) Suliffissarsiortunut suliffissanik innersuussisassallutik aamma sulisitsisunut inuussutissarsiutini assigiinngiiaartuni tamani sulisussanik innersuussisassallutik aamma suliffissanut atorfinnullu assigiinngiiaartunut tamanut.

4) Ilinniartitaanernut qinnuteqartunut siunnersuisassallutik qinnuteqartunillu allaffissornikkut aqutsinermik suliaqarlutik.

5) Meeqqat atuarfiat suleqatigalugu klassit annerit siunnersorneqartarnerannik ingerlatsisuussallutik.

6) Suliffissaqarnikkut siunnersuinermik suliffissarsiortunut neqerooruteqartassallutik, inunnullu ataasiakkaanut iliuusissatut pilersaarusiortassallutik, suliffissaaleqisut pineqartut suleqatigalugit, suliffeqalivinnissamik siunertaqartumik.

7) Suliffissaaleqisut pikkorissarneqarnerannut atatillugu inuussutissarsiutitut pikkorissartitsinernik innersuussisassallutik. Suliffissanut, ilitsersuisarnernut pikkorissartitsinernullu qitiusumik ingerlatsiviit ilinniagaqalernissamut imaluunniit suliffeqalernissamut piareersaataasunik pikkorissartitsinernik ingerlatsisinnaapput.

8) Innuttaasunik suliffeqanngitsunik tulluarsaqatigiiaanut immikkoortiterisassallutik.

9) Suliffissaaleqisut suliffissarsiuussisarnermi nittartakkamut paasisutissanillu nalunaarsuiffinnut allanut naleqquttunut nalunaarsortassallugit.

§ 3. Suliffissanut, ilitsersuisarnernut pikkorissaqqinnernullu qitiusumik ingerlatsiviit suliffeerunnermi ikiorsiissutit aamma piginnaanngorsaaqqiinissamut tapiissutit aqutaraat, piginnaanngorsaaqqittunut inunnullu suliffeerunnermi ikiorsiissutinik pisartagaqartunut tunniunneqartatut.

Imm. 2. Suliffissanut, ilitsersuisarnernut pikkorissaqqinnernullu qitiusumik ingerlatsiviit

innuttaasut piginnaangorsaaqqinnermi peqataasinnaasut suleqatigalugit piginnaangor-saaqqinnissamut pilersaarummik suliaqartassapput.

Imm. 3. Suliffissanut, ilitersuisarnernut pikkorissaaqqinnernullu qitiusumik ingerlatsiviit nikilertortarnikkut nuunnissamut aningaasaliissutinik tapiiffigineqarnissamik qinnuteqaatit suliarisassavaat.

Imm. 4. Suliffissanut, ilitersuisarnernut pikkorissaaqqinnernullu qitiusumik ingerlatsiviit sulisitsisut sulisussanik avataaneersunik sulisoqarnissamut qinnuteqaataat suliarisassavaat.

Kommunalbestyrelsip suliassai

§ 4. Kommunalbestyrelsip isumagissavaa suliffissanut, ilitersuisarnernut pikkorissaaqqinnernullu qitiusumik ingerlatsiviit sullinneqassasut siunnersortinit sulianillu ingerlatsisunit pisariaqartunik piginnaanilinnit, takuuk imm. 2, aammalu sullissineq ingerlanneqassasoq naleqquttunik avatangiisilimmik.

Imm. 2. Siunnersuisarneq aamma sulianik ingerlatsineq suliarineqassapput ilinniartitaanernut aamma inuussutissarsiutinut siunnersuinermik ilinniagalinnit, Naalakkersuisunit akuerisaasunit, imaluunniit inunnit pineqartut assinginik piginnaaneqarnermik uppersaasannaasunit. Kommunalbestyrelsimiit qinnuteqartoqarneratigut Naalakkersuisut akuerisinnaavaat Siunnersuisarneq sulianillu ingerlatsineq utaqqiisaasumik ingerlanneqarsinnaasoq inummit allatigut ilinniagaqartumit, siunnersorti pineqartoq aallartissimappat imaluunniit pilersaaruteqarpat ilinniartitaanernut siunnersortitullu Naalakkersuisunit akuerisaasumik ilinniagaqar-niarlugu.

§ 5. Kommunalbestyrelsip qitiusumik suliffissanut, ilitersuisarnernut pikkorissaaqqinnernullu ingerlatsiviit kommunip suliassaanut allanut allaffissorneranullu attuumassuteqanngitsumik aningaasaqarnikkullu kiffaanngissuseqartumik Naalakkersuisunut naammassisassanut isumaqatigiissuteqarneq tunngavigalugu ingerlatarissavai.

Imm. 2. Kommunalbestyrelse suliffissanut, ilitersuisarnernut pikkorissaaqqinnernullu qitiusumik ingerlatsiviit ingerlanneqarnerannut ilanngullugu ataatsimiititalianik siunnersuisussanik pilersitsisinnaavoq, inuussutissarsiortunit aamma suliffeqarnermi illuatungeriinnit peqataaffigineqartumik.

Imm. 3. Kommunalbestyrelsip isumagissavaa suliffissanut, ilitersuisarnernut pikkorissaaqqinnernullu ingerlatsivinnut tamanut suleqatigiinnermut aaqqissuussinermik ataatsimik pilersitsisoqartassasoq, suliffissanut, ilitersuisarnernut pikkorissaaqqinnernullu qitiusumik ingerlatsivimmiit, isumaginnittoqarfimmiit kiisalu meeqqat atuarfianniit peqataaffigineqartumik.

§ 6. Kommunalbestyrelsip isumannaassavaa paasisutissat naleqquttut tamarmik suliffissanut, siunnersuisarnernut pikkorissaaqqinnernullu qitiusumik ingerlatsiviit suliainnik ingerlatsisinnaajumallutik pisariaqartitaat pissarsiarineqarsinnaasasut.

Nakkutilliineq

§ 7. Naalakkersuisut suliffissanut, siunnersuisarnernut pikkorissaaqqinnernullu qitiusumik

ingerlatsivinnut nakkutilliisuupput.

§ 8. Kommunalbestyrelsip Naalakkersuisunut nalunaarusiortassavai kisitsisit paasissutissat suliffissanut, siunnersuisarnernut pikkorissaqqinnernullu qitiusumik ingerlatsivinnut tunngasut. Kommunalbestyrelsip programmit Naalakkersuisut nalunaarusiortarnernut atugassanngortitaat atortassavai.

Imm. 2.

Naalakkersuisut nalunaarusiortarneq pillugu ersarinnerusunik aalajangersagaliorsinnaapput.

Naammassisassanut isumaqatigiissut ingerlatsinermullu aningaasaliissutit

§ 9. Naalakkersuisut kommunalbestyrelsimut naammassisassanut isumaqatigiissuteqassaaq, suliffissanut, siunnersuisarnernut pikkorissaqqinnernullu qitiusumik ingerlatsivinnut atatillugu. Naammassisassanut isumaqatigiissut aalajangersaassaaq suliffissanut, siunnersuisarnernut pikkorissaqqinnernullu qitiusumik ingerlatsivinni ersarinnerusunik anguniagassat pillugit.

Imm. 2. Naalakkersuisut kommunini ataasiakkaani suliffissanut, siunnersuisarnernut pikkorissaqqinnernullu qitiusumik ingerlatsivinnut aningaasaliissutaasunik kiffartuussinermi isumaqatigiissutsikkut annikillisisinnaapput, kommunalbestyrelsip kiffartuussinermut isumaqatigiissummi piumasaqaataasut naammassinngippagit.

Atuutilerfia

§ 10. Inatsisartut inatsisaat atortuulissaaq ulloq 1. januar 2016.

Imm. 2. Ilutigisaanik atorunnaassapput § 5, imm. 1, imm. 3 aamma imm.5, kiisalu § 12 Suliffeqarnermi innersuussisarneq il.il. pillugit Inatsisartut inatsisaanni nr. 5, 8. juni 2014-imeersumi.

Imm. 3. Malittarisassat Suliffeqarnermi innersuussisarneq il. il. pillugit Inatsisartut inatsisaat nr. 5, 8. juni 2014-imeersumi aalajangersagaasut atuutiinnarallassapput allanik taarserneqarnissami imaluunniit uani inatsimmi aalajagersakkanik tunngavilimmik imaluunniit Inatsisartut inatsisaat alla naapertorlugu atorunnaarsinneqarnissami tungaannut.

Namminersorlutik Oqartussat, ulloq 9. december 2015

Kim Kielsen